

**Muhtasari**


- Vipindi vya hali ya ukavu vinatarajiwa kusaidia kukomaa, uvunaji na uhifadhi wa mazao, hususan maeneo yapatayo msimu moja wa mvua.
- Athari zitokanazo na uvamizi wa viwavi jeshi zinaweza kuhatarisha usalama wa chakula katika maeneo yaliyoathirika.

**MIFUMO YA HALI YA HEWA KATIKA KIPINDI  
CHA JUNI 11-20, 2018**

**K**atika kipindi hiki cha siku kumi zilizopita (dekadi) migandamizo mikubwa ya hewa iliyopo kaskazini mwa dunia (Azores na Siberia) iliendelea kudhoofika wakati ile iliyopo sehemu ya kusini mwa dunia (St. Helena na Mascarene) iliendelea kuimarika. Ukanda wa mvua (ITCZ) ulielekea kaskazini zaidi. Pamoja na kuimarika kwa mgandamizo mkubwa wa hewa wa kusini, kulikuwa na eneo lenye mgandamizo mdogo wa hewa katika kisiwa cha Madagasca hali iliyopelekea vipindi vya upepo mkali katika maeneo mengi ya nchi. Joto la bahari katika maeneo ya kusini magharibi mwa bahari ya Hindi lilikuwa la wastani na kusababisha kutokuwepo kwa vimbunga baharini. Upepo ulivuma kutoka kusini hadi kusini mashariki katika maeneo mengi ya nchi. Eneo la Kusini mashariki mwa bahari ya Atlantiki (karibu na pwani ya Angola) kuliendelea kuwepo na joto la bahari la wastani hadi juu kidogo ya wastani. Hali hii ilisababisha kupunguza kwa mifumo ya kusababisha mvua katika maeneo ya magharibi mwa nchi

**MWENENDO WA MVUA KATIKA KIPINDI  
CHA JUNI 11-20, 2018**

**K**atika kipindi cha siku kumi zilizopita, vipindi vifupi vya mvua zimeendelea katika baadhi ya maeneo yanayopata misimu miwili ya mvua hususani maeneo ya nyanda za juu kaskazini pamoja na maeneo ya ziwa Victoria. Hata hivyo maeneo mengi ya nchi yalipata mvua kati ya 0 mpaka 10mm kama inavyoonekana kwenye kielelezo chini.



**Kielelezo Na. 1.** Kiasi cha mvua kipindi cha tarehe 11-20, Juni, 2018.

**TATHMINI YA HALI YA KILIMO KATIKA  
KIPINDI CHA JUNI 11-20, 2018**

**K**atika kipindi cha dekadhi iliyopita, wakulima waliendelea na shughuli za uvunaji wa mahindi katika baadhi ya maeneo yanayopata msimu mmoja wa mvua, hususan katika mikoa ya Ruvuma, Mtwara, Rukwa na Njombe. Maeneo mengi yanayopata msimu mmoja wa mvua maindi yalikuwa katika hatua ya kukomaa. Maharage yapo katika hatua ya kukomaa mkoani Mbeya, mpunga unavunwa katika mikoa ya Tabora na Kigoma.

Maeneo yanayopata misimu miwili ya mvua shughuli za mavuno zinaendelea, mpunga na viazi vinavunwa katika mkoa wa Shinyanga, maharage yanavunwa mikoa ya Mara na Kagera, na mtama unavunwa katika mkoa wa Mara. Mahindi yamearifiwa kuwa katika hatua ya kukomaa katika maeneo mengi yanayopata misimu miwili ya mvua. Mikoa ya Simiyu, Tabora, Shinyanga, Mara na Kagera, wakulima wanaendelea na uvunaji wa mahindi. Imetaarifiwa kuwepo kwa athari kubwa za Viwavi jeshi katika mikoa ya Morogoro, Manyara, Mara, Kilimanjaro na Arusha. Hali ya maji na malisho kwa ajili ya wanyama ilikuwa ya kuridhisha isipokuwa mikoa ya Dodoma na Tabora ambapo maji yameanza kupungua

Uharibifu uliotokana na mafuriko - mvua za masika pamoja na viwavi jeshi vimeathiri mazao kwa kiasi kikubwa na kusababisha uhaba wa chakula hususan katika maeneo ya Mwanga (wilaya ya Same), ambapo wakulima wanapata msaada wa chakula kutoka serikalini.

**HALI YA MAJI ILIVYOKUWA KATIKA KIPINDI  
CHA JUNI 11-20, 2018**

**K**ina cha maji katika mabwawa, mabonde na mtiririko wa maji katika mito ilikuwa ya wastani, isipokuwa bonde la ziwa Victoria na Pangani ambapo hali ya maji inaonesha kuwa nzuri zaidi.

**MIFUMO YA HALI YA HEWA  
INAVYOTARAJIWA KATIKA KIPINDI CHA  
JUNI 21-30, 2018**

**K**atika kipindi hiki, migandamizo mikubwa iliyopo kaskazini mwa dunia inatarajiwa kuendelea kudhoofika wakati ile iliyopo kusini inatarajiwa kuendelea kuimarika. Ukanda wa mvua (ITCZ) unatarajiwa kuendelea kusogea kuelekea kaskazini hali itakayopelekea upepo kuvuma kutoka kusini hadi kusini mashariki katika maeneo mengi ya nchi. Joto la bahari la wastani hadi chini ya wastani linatarajiwa katika eneo la kusini magharibi mwa bahari ya Hindi hali itakayopunguza uwezekano wa kutokea vimbunga katika bahari. Upepo unatarajiwa kuvuma kutoka kusini hadi kusini mashariki hali itakayopelekea hali ya baridi katika baadhi ya maeneo hasa yale yaliyoko kusini mwa nchi na katika sehemu zenye miinuko. Eneo la Kusini mashariki mwa bahari ya Atlantiki (karibu na pwani ya Angola) kunatarajiwa kuwa na joto la bahari la wastani hadi juu kidogo ya wastani. Hali hii itapelekea kupunguza kwa upepo uvumao kutoka magharibi hivyo kupunguza nguvu ya mifumo isababishayo mvua katika maeneo ya magharibi mwa nchi.

**HALI YA HEWA INAVYOTARAJIWA KATIKA  
KIPINDI CHA MEI 21-30,2018**

**K**atika kipindi cha siku kumi zilizopita Kanda ya ziwa Victoria (Mikoa ya Kagera, Geita, Shinyanga, Mwanza, Simiyu na Mara inatarajiwa kuwa na): Vipindi vya mvua zinazoambatana na ngurumo za radi katika maeneo machache.

Nyanda za juu kaskazini mashariki (Mikoa ya Arusha, Manyara na Kilimanjaro,); Nyanda za juu Kusini magharibi (Mikoa ya Rukwa, Songwe, Mbeya, Njombe na Iringa) na Kanda ya kusini (Mkoa wa Ruvuma na Maeneo ya kusini mwa Morogoro) inatarajiwa kuwa na Mawingu kiasi kwa ujumla

Pwani ya kaskazini (Mikoa ya Tanga, Maeneo ya kaskazini mwa Morogoro, Pwani na Dar es Salaam pamoja na visiwa vya Unguja na Pemba) na Pwani ya kusini (Mikoa ya Mtwara na Lindi) inatarajiwa kuwa na Mvua nyepesi katika maeneo machache.

Magharibi mwa nchi (Mikoa ya Kigoma, Katavi na Tabora) na Kanda ya kati (Mikoa ya Dodoma na Singida) inatarajiwa kuwa na Mawingu kiasi.

**MATARAJIO NA USHAURI WA KILIMO KATIKA  
KIPINDI CHA JUNI 21-30, 2018**

**H**ali ya ukavu inayotarajiwa itasaidia kukomaa kwa mazao, Hukaushaji, uvunaji na uhifadhi wa mazao. Athari zitokanazo na shambulio la viwavijeshi kwa wilaya za Arumeru na Kilosa, na mikoa ya Mara, Mwanza (Same district) na Manyara zinatarajiwa kuathiri usalama wa chakula katika maeneo hayo. Wakulima katika maeneo hayo wanashauriwa kuweka akiba ya ziada ya chakula kuepuka janga la njaa, na kutumia chakula kwa uangalifu ili kuepuka baa (janga) la njaa.

Hali ya maji pamoja na malisho vinatarajiwa kuwa katika hali nzuri na utoshelevu katika maeneo mengi ya nchi. Hata hivyo, wakulima, wavuvi na wafugaji wanashauriwa kuwasiliana na maofisa ugani kwa ajili ya kupata ushauri na matumizi sahihi ya utabiri huu.

**HALI YA MAJI INAVYOTARAJIWA KATIKA  
KIPINDI CHA JUNI 21-30,2018**

**K**ina cha maji katika mabwawa na mtiririko wa maji kwenye mito vinatarajiwa kuwa vya wastani katika sehemu nyingi nchini. Hata hivyo, wananchi wanashauriwa kutumia maji kwa uangalifu kwa matumizi endelevu ya rasilimali hii.

*Jarida lmetayarishwa na:*

**Mamlaka ya Hali ya Hewa Tanzania  
Ghorofa ya 3 -Ubungo Plaza – Barabara ya Morogoro, Dar es Salaam-Jamhuri ya Muungano wa Tanzania**